

TARZAN

(si sente l'urlo di Tarzan da fuori subito dopo Tarzan entra in scena come se stesse cadendo da una liana, quindi saltando da una sedia o simile, attraversa il palco in precario equilibrio, barcolla un poco e poi si posiziona, ha in mano un pezzo di "liana" rotta)

L'hana 'ammazzari a sti liani fraciti, mi stava rumpennu u coddu ... chi ci ridi tu? Chi ti pari ca è facili caminari 'nta giungla appinnutu a sti malanova ca si vanu rumpennu? Certu tu t'aspetti 'nta machina e va furriannu tranquillu ... iu non m' u pozzu permettiri! Picchi non ci provi a fariti na furriata 'nta giungla cca to machina? Arvuli a destra, serpenti a sinistra scimmii ca ttraversunu a strata senza taliari, Liafanti parcheggiati ca non si smovunu mancu a corpi di petra ... e a mia non mi resta ca caminari appinnutu 'nte liani all'usu d'e scimmi. Ca appoi chi ti pari facili stu fattu d'e liani? Mizzica! Ha stari attentu a chidda troppu tennira ca si rumpi, a chidda sciddicusa picchi atummi 'nterra, a chidda 'mpicciusa picchi arresti appinnutu 'nta l'aria ... vuatri v'arrichriati quannu sintiti l'urlo di Tarzan ... ma chi ni sapiti picchi gridu? Chi dici? Ppi fari scappari l'animali? Si a iddi stai pinsannu ... picchi non ci pruvati a cchiappari a volu na liana china di spini? Ah? A tia ti pareva ca era un segno di potere? U sai chi potere ca c'hai quannu si a trenta metri 'ntall'aria e 'ncapiti na liana fracita ... mentri caschi a testa sutta chi ti vinissi di fari a tia, di cantari? Iu sta vita ammenzu a giungla chi ti pari ca mi piaci assai? Ma d'altra parti iu sulu stu misteri sacciu fari: u Tarzan. E poi si ... mi ni issi 'nto to paisi ... almenu cca a barracca ppi dormiri ci l'haiu gratis ni tia a vuliti macari pavata ... no, non è ca a vita 'nta giungla è propriu brutta, hai qualche comodità superchiu ... tu ppi na tazza di latti trasi o bar e iu 'nveci haia ghiri assicutannu a bufala giungla giungla ... iu a matina m'arrusbighiu e allatu ci haiu a Cita ca dormi, e tu 'nveci hai a to muggieri ... e ddocu forsi n'assumigghiamu ... però tu si o sabbutu voi nesciri cu na carusa scinni a chiazza e ni trovi quantu voi, mentri cca non passa nuddu ... Chi dici? Iu ci haiu a Jane? Si ca ora ... aveva a Jane ... pi na para di simani ... e chi ti pari ca dda cosa fina si arrizzittava a campari 'nta giungla? N'e primi tempi tuttu a postu: io Tarzan tu Jane, ci ammazzai qualche coccodrillu ppi farimi spertu, due cuori e una capanna, u vistitu di peddi, mangiaumu zoccu truvaumu, 'nsumma na vita normali ... adoppu quarche simana accuminciaru i storii: *(imitando Jane) Questa vita è monotona, idda ca stava tuttu u iornu 'nta capanna, no iu ca era sempre a sbattiri giungla giungla, e non mi uccidi più neppure nenche un coccodrillo, a usu ca 'mmazzari un coccodrillu era comu scippari un mazzu di ciuri, no? Questa casa non mi piace più* e iu ci u dissi fattinni n'otra ... nossignori ci l'hava fari iu ma u re da giungla si po' mettiri a fari u muraturi? *Ora fa freddo e voglio una pelliccia di leopardo, il divano di pelle di rinoceronte è troppo duro, a doccia cca funcia dell'elefante mi fa schifo, auh quannu arrivamu ca ddivintau gilusa puru di Cita ... ddocu 'mpocu mi preoccupi e ci dissi: ma chi ti vulissi paragonari a Cita? Idda capiu tutta n'otra cosa e m'accuminciau a fari: ti riferisci forse ai miei peli superflui? E se qui non c'è nemmeno un estetista!* E iu circai di cunsularla e ci dissi: no cara haia durmutu ppi trent'anni ccu Cita ... picchi m'avissa preoccupari di tia ca pila n'hai chiù picca assai? E idda ddocu aumintau a dosi *Allora è vero mi tradivi con cita e io non ne sapevo niente!* Ma quali, ci dissi iu, picchi t'avissi a tradiri ccu Cita ni mancavunu scimmi 'nta giungla ... *Ah ora anche scimmia mi dici? Perché non ti guardi tu che sembri un gorilla, gorilla, gorilla e gorilla, tu e quella gorilla di tua madre...* ora è veru ca iu fui addivatu di na gorilla ma comu u dissi idda era troppu offensivu e arrivati a ddocu non ci visti chiù di l'occhi, idda si n'approffittau e quannu ci visti di novu non c'era chiù...

E poi a propositi di stari 'nta giungla, dicemu a virità: stu fattu di iri vistutu ccu custumi di peddi non ti pari ca è tantu commudu ... i zanzari ti mangiunu vivu, ti fai u bagnu 'nto ciumi e i sagnetti t'asciugunu a corpu, t'aspetti a quarche banna e i spini t'arraccamunu tuttu, non parramu poi di stu fattu ca 'nta giungla non si usunu i scarpi ... provici tu a caminari 'nta giungla senza scarpi ... spini, scursuna, serpi, coccodrilli, firoi carnivori ... sai chi spassu ... mah ... quantu mi ni vaiu ... o si viriti a dda cosa fina di Jane ci riciti ca torna, no, non ppi sempre almenu ca si veni a pigghiari tutti i truchi e i stucci ca si fricava 'nta facci, ca cca c'è cita ca è arridduca na maschira, non fa autru ca 'nchiapparisi ddi purcarii 'nta facci ... arrivederci *(fa qualche passo si punge un piede e va via saltellando e lanciando di nuovo l'urlo di Tarzan)*